

# Dors, min p'tit quinquin

## Refrain

- Dors, min p'tit quinquin,  
Min p'tit pouchin,  
Min gros rojin !  
Te m'ffras du chagrin  
Si te n'dors point j'qu'à d'main.

Ainsi l'aut'jour eun' pauvr' dintellière  
In amiclotant sin p'tit garchon  
Qui, d'puis tros quarts d'heur', n'faijot qu'braire  
Tâchet l'indormir par eun' canchon.  
Elle'li dijot : - Min Narcisse,  
D'main t'aras du pain d'épice,  
Du chuc à gogo  
Si t'es sache et qu'te fais dodo.

## Refrain

Et si te m'laich' faire eun' bonn' semaine,  
J'irai dégager tin biau sarrau  
Tin pantalon d'drap, tin giliet d'laine,  
Comme un p'tit milord te s'ras farau !  
J't'acat'rai, l'jour d'la ducasse,  
Un porichinell' cocasse  
Un turlututu  
Pour jouer l'air du Capiou-pointu.

## Refrain

Nous irons dins l'cour Jeannette-à-Vaques  
Vir les marionnett's. Comm' te riras,  
Quand t'intindras dire : - Un doup' pour'Jacques !  
Pa' l' porichinell' qui parl' magas.  
Te li mettras din s'menotte  
Au lieu d'doupe, un rond d'carotte !  
Y t'dira : - Merci !  
Pins' comm' nous arons du plaisi !



## Refrain

Et si par hazard sin maite s'fâche  
Ch'est alors, Narciss', que nous rirons  
Sans n'avoir invi', j'prendrai m'n air mache,  
J'li dirai sin nom et ses surnoms,  
J'li dirai des fariboles,  
Y m'in répondra des drôles.  
Infin, un chacun  
Verra deux spestac' au lieu d'un.

## Refrain

Alors, serr' tes yeux, dors, min bonhomme  
J'vas dire eun'prière à P'tit-Jésus  
Pour qu'y vienne ichi, pindant tin somme,  
T'faire' rêver qu'jai les mains pleins's d'écus  
Pourqu'y t'apporte eun'coquille,  
Avec du chirop qui guille  
Tout l'long d'tin minton.  
Te pourlèqu'ras tros heur's de long !

## Refrain

L'mos qui vient, d'Saint-Nicolas ch'est l'fête.  
Pour sûr, au soir, y viendra t'trouver  
Y t'ff'ra un sermon et t'laich'ra mette  
Ind'zous du balot un grand painnier  
Y l'rimplira, si t'es sache  
D'séquois qui t'rindront bènache.  
Sans cha, sin baudet  
T'invoira un grand martinet.

## Refrain

Ni les marionnett's, ni l'pain d'épice  
N'ont produit d'effet. Mais l'martinet  
A vit' rappajé l'petit Narcisse  
Qui craignot d'vir arriver l'baudet.  
Il a dit s'canchon-dormoire.  
S'mèr' l'a mis dins s'n ochennoire,  
A r'pris sin coussin  
Et répété vingt fos che r'frain :

## Refrain